

# 抄本《蕙荪堂烬存草》(上)

昭 槿著 王大可标点

**编者按：**北京图书馆所藏清人昭槿（1776—1829）著《蕙荪堂烬存草》旧抄本二卷，本刊已于上期作了介绍。此书系一九五三年入藏，已故著名版本学家赵万里先生曾在书卡上注明“从潭柘寺废纸堆中检来”云云。今查《清史稿艺文志及补编》、《贩书偶记》、《贩书偶记续编》等书簿均未著录，《清代名人传略》也不见记载。《八旗文经》卷五十七谓昭槿有“诗、集二百余篇皆往体，武进费氏得之以畀伯熙。其文集丛残已甚，在铁龄家。铁龄歿后，图籍散佚，不可究诘”。又，中华书局近出《啸亭杂录》在点校说明中，也说：“昭槿尚有诗、文二百余篇已散失”。因此，北图所藏此本弥足珍贵。今除将异体字改作简体字外，悉照原书排印，只作标点，未加校勘，仅供研究清史、清代诗文者参考。（其《蕙荪堂集》一卷，稿本，今藏上海图书馆）。

## 蕙荪堂烬存草卷一

昭槿颛颥老人录存

余少耽吟咏，寒暑不辍，至乙亥冬，手订三十卷。不意身罹罪戾，诗草尽被悍仆焚毁。幸他室有幼岁所著者，今已录出。其丙

辰、丁巳、戊午，及庚申至甲子，戊辰至乙亥十数年之作，皆湮失无存，曷胜扼腕。今于暇日将记忆者丛录二卷，以存梗概，诗之工拙，不复计也。己卯夏日书。

### 春日十咏

#### 春城

启钥听晨鸡，韶□□望迷。九衢星骑□，□□曙烟齐。铙鼓传深巷，飞□□□□。闾阖饶士□，□□向郊西。

#### 春月

三五溶溶月，清光满画楼。花堤香雾敛，柳岸翠烟浮。诗酒豪家宴，笙歌酤客游。何当入罗幌，少妇正多愁。

#### 春山

夕阳明远岫，杖底认烟霞。叠翠连天尽，晴光绕郭斜。细泉明古涧，夜雨落岩花。满幅荆关画，丹铅莫可加。

#### 春水

十里金隄香，空濛接远天。声连归渡雨，涨合古城烟。花柳明汀畔，帆幢下日边。何堪秋水落，枫叶冷征船。

#### 春雁

衡阳春信早，旅雁返荆乡。度岭呼群急，穿云结伴翔。潇湘归路紫，□塞隔年霜。嘹唳高楼畔，红闺惹恨长。

#### 春燕

候社归期近，呢喃认故梁。年华经代谢，里巷几炎凉。掠水声悠转，穿帘影颀颀。差强翟公客，弹铗散空堂。

### 春雨

簾櫳知时节，轻阴满禁城。暮连邻笛曲，梦断卖花声。红袖高楼怨，青灯客子情。欢声遍村里，及早事春耕。

### 春花

馥郁韶光满，群芳烂漫时。绛桃村馆壁，红杏酒家旗。访胜吟囊共，游踪饮□□。□□须爱惜，□□□风吹。

### 春闺

楼头慵挽髻，柳色送新春。玉臂当清昼，□钱卜远人。锦机才属蕙，桑陌女推秦。好约同心伴，晴郊走画轮。

### 春梦

角枕歌晴昼，高眠信快哉。春云巫岫杳，芳草蝶园开。过眼情难驻，伤心境自猜。游仙非我今，此地许时来。

### 和旭亭师陶然亭元韵

旅邸初看解客骖，盍簪樽盍聚僧龕。绿摇水面生新苇，青出城头认远岚。花落空阶春已暮，光添华烛酒初酣。追思数载经行地，说罢江南说海南。

曾将风土问瑶(原作“猺”字)黎，过眼云山路不迷。度岭猿如吹夜角，上滩舟似踏层梯。冥搜古迹增诗草，选胜烟峦付杖藜。此夕归装来日下，讲筵早设凤城西。

### 赠顾星桥铨部叠韵

仙郎出惯乘疲骖，薄暮人归月满龕。对景眼前开药圃，偷闲腕底落烟岚。酒兵招客机谁敌，文阵传笈战每酣。恰值昌黎返潮海，挑灯连夕话城南。

曾除害马拯苍黎，七圣途逢定不迷。官冷荒苔侵雨牖，楼高明月上云梯。当时伉爽夸裘马，此日清斋惯藿藜。转眼秋风满林壑，约携樽酒访郊西。

### 送顾星桥太守之高州任

诏出枫宸守瘴□，□驹声里饯征觞。久□粉署命何蹇，老向日南心转伤。笑我绣囊犹绣(羞)涩，羨君剑匣吐光芒。羊城荒渺多仙迹，好蓄丹砂入药铛。

吟盟在昔聚堂帘，啸咏高楼月满檐。负笈讲筵师沈约(君为沈文意弟子)，梦花春渚继江淹。播名洛邑文雄放，启事藤厅政谨严。索米十年甘澹泊，由来吏隐一身兼。

曳裾曾至孝王家，金石文成重日华。座有凯之初击钵，饮无顾况不传花。放舟南浦秋生早，听漏西园月半斜。敢诮韩门客湜籍，砚池曾侍学涂鸦。

漫言白傅已华颠，垂老乘轩众所怜。岂以威声传乳虎，肯将别泪寄啼鹃。海天日暖春常在，岭峤人稀化易迁。好是悬鞭多暇日，寒梅及早递诗笺。

### 喜旭亭师至

粤徼水无涯，君浮万里槎。白涵珠浦月，红敛海天霞。五载羊城杳，三秋雁字赊。喜今睹师范，垂老客京华。

### 和旭亭师同人游极乐寺原韵

西州旧路感羊曇(寺为质庄亲王觞咏之所)，竹径篱扉我最谙。胜地久经闲艺圃，良游及早记分柑。翠浮烟岭秋方老，红染霜林色正酣。自愧文园曾抱疾，未同蒲座学和南。

### 挽朱文正公

一夕妖星坼上台，老成凋谢士林哀。翠华奠醑君恩重，轩鼎均调国脉培。辟谷徒思辞绛阙，还丹未果返蓬莱。遗荣美溢千秋□，□□□□□苒□。

仗节珠江拥上游，两朝名□卜金瓯。翘□荐士同萧相，诡诞谈仙似邳侯。东阁回翔招济济，黄扉夷粹养休休。漫嫌谈吐多疏阔，旷代无瑕可索求。

苦学昌黎习未除，驱回奇险逸才摅。青箱宝护岫嵒帖，金简珍藏宛委书。问字审形分邈颡，谈经辨物疏虫鱼。文名冀北联华萼，会见光芒射斗墟。（公兄竹君太史学亦渊博）

深惭学术本芜荒，说项烦公远播扬。疏柳共吟西苑月，长廊同踏泰坛霜。命占明远言何验，剑挂徐君兴正长。底事骑箕人遽去，寝门哭奠剧堪伤。（丙寅春，双五病剧，公言其禄命方长，后果愈。秋间曾同吊吴种芝铨部。）

### 挽刘文清公

崔巍泰山巔，层云兴尺蠖。维甫降河岳，方洋位显著。堂堂文正公，先朝赞猷略。司马德浑厚，广平功焯赫。公乃禀华胄，青年材绰约。碓郡典白下，清俭世昭灼。父老争颂黄，儿童共迎郭。政暇工临池，踟蹰如舞鹤。太傅笔刚劲，河南性饔饩。晚年登黄扉，锋锐尽斂削。滑稽效东方，恬旷退西洛。不慕养生术，耄年犹矍铄。一旦坐委化，形躯龙蛻若。没世被恩荣，俎豆祀崇阁。余生幸仰企，训迪语嗃嗃。心伤老成人，抚膺清泪落。

### 挽王文端公

关内风勤俭，蓬山早蹶登。才华推海岳，志操挟霜冰。洛蜀交无党，金张气可□。立□惟正色，天□信堪凭。黄发□乡井，

丹书拜命□，天闾扶王杖，帝子钱蒲轮，指佞嘉猷进，忧危秘策陈。关门春正好，烟柳送归秦。

经年重诣阙，元会侍箫韶。抹(秣)马人将返，骑箕遽见招。云山悲昨梦，风雪送灵輶。奠醑烦宗老，恩荣得更邀。登朝齿逾壮，犹幸识希文。旧友情如雨(公与家君交最睦)，新知义薄云。执经席未暖，负笈志方勤。何事星垂殒，苍凉吊夕曛。

### 恭挽高宗纯皇帝四律

四海春风遏八音，湛恩沦浹感人深。鹤飞直讶尧年雪(去冬大雪旬日)，龙去犹余舜日琴。羲画纪年功冠古，武成拓土业垂今。幸逢继统多仁孝，新政欣传慰众心。

龙飞厚泽纪初年，闾巷讴歌万口传。云幕岁瞻清庙享，炉烟亲礼泰坛烟。备荒蠲赋穷垓外，勤政求衣晓箭前。更睹虞廷曾授受，福超今古倍周全。

忆昔孤臣构愆凶，蛾眉谣逐共交讧。狱词焚毁原梁孝，天语昭详辨楚弓(乙亥春，臣父以失察护卫出境之咎，某贵臣嗾之，构成大狱。赖上温旨以免)。俾锡金钱恩宠渥(臣父以疾罢朝，请上，特赐半俸)，高颁几杖礼优容(丙辰春，臣父预千叟宴，例赐节杖)。宗臣世裔瞻天久，清泪深宵怅晚风。

迎銮紫陌记髫年(甲辰冬，臣九岁，迎驾于西安门外，特赐双眼花翎)，两袖香薰御座烟(丙午冬，臣引见□宫)。□□自惭宗子志，临朝常说贾生贤。葵心未果依红日，龙驭何期恻九天。薄海苍黎应共哭，私恩岂独泪潸然。

### 蒙恩授散秩大臣恭纪四律

廿载栖迟叹索居，登朝身幸近明庐。深惭淹博名难副，自笑疏狂习未除。电影较量盘马伎，龙纹课录上清书。回思勇伎传先代，追溯家声自谦如。

瞳眈旭日射觚棱，禁陛峻层步仰登。渊穆御容惊乍对，温和天语喜亲承。垂询家世情何似，追念前勋愧不胜。敢恃恩纶骄退食，依然慎毖若无凭。

匪懈何辞夙夜劳，御烟沾惹幸身遭。风飘长乐钟声杳，漏静天闾象纬高。蠹眼导随材士戟，朝衣斜佩侍中刀。更番西苑勤环卫，料峭春寒上锦袍。

何尝横槊擅诗名，厌忌偏遭绛灌轻。投紵自惭希侣辈，盍簪尚喜有同盟。禅心夜课通恬性，绮语朝翻善倚声（德斋通禅理，思元善小词）。促膝严廊话终夕，铜龙不觉送残更。

### 挽谢芑泉祠部

九夏昼苦长，炎歊日薰灼。白衣来潞河，开缄事骇愕。元晖方中寿，遽尔返元漠。百里阻吊唁，自叹纓冕缚。忆昔少壮时，久抱匡君略。雄名题雁塔，花砖步瀛阁。淮海拥豹舄，江表掌凤铎。獬冠巡京兆，端严拒请托。何来冯子都，驱车日轻薄。我公立捕治，双轮付融爝。权门王给事，剡牍助威虐。繁纓□褻□，□甫反贬削。雍容谢京邑，皦皦云中鹤。吴楚远游览，山□任淹泊。先王重高义，招延致莲幕。时余甫弱冠，结交重然诺。箴诫纠木绳，良规瘳疾药。自愧莛鸣钟，听闻日淹博。往昔岁云暮，雪夜香醪酌。朱邑时在坐（朱白泉观察），谈论何恢廓。明镜照虚室，宝剑淬霜锷。古今互讨论，潸然清泪落。一官喜膺遇，容台掌祠约。转漕潞水湄，持节太华萼。方期励臣操，良冶时踊跃。何意竟永别，旅榭栖清澗。岂惟痛知交，朝野共惊矍。回思樽俎时，情景仍如昨。稍喜龄石勇，奇勋树海舶。万里讣音传，须知意焦焦。

### 挽姚姬传先生

忆昔承欢鲤庭侧，朝夕谈文示轨则。海内唯推姚武功，斥弃

名流俨撻埴。年年江上通鱼书，每值开缄愧不如。秋窗证跋群经解，春雨高吟卧雨图。思廉著述尤豪迈，心承父训代轻当。余蒙两世重交情，炙輠谈天无窒碍。叹余久抱泉鱼忧，叔党出仕天南头。先生醇笃守古谊，罔因高尚轻王侯。辞章要道受心法，锦笺束帛时相酬。秋风何意悲掩冉，少微星殒寒芒敛。闻信心伤者旧稀，潸潸泪落巾难掩。千里何堪会面迟，龙眠远眺空依依。生当欲吊羈官守，梦化江干孤鹤飞。

### 闻道

闻道荆襄北，潢池有逆图。酿成由酷吏，激变起萑苻。浩叹军无律，空闻法有诛。素□□□盗，疏草□封输。

军阻当阳郡，梯辘计未成。赤眉坚诅誓，白面坐谈兵。赏已酬辛甲，功仍待癸庚。鲁连谁企及，一纸下燕城。

黄栢岭嵌崟，余氛匿邓林。总戎真赵括，猷馘误孙歆。诘屈枯藤险，阴霾古栈沉。经年兵渐老，佇盼报佳音。

劲旅传神策，军声四合围。张罟防鹿挺，麾帜辨云飞。叔子名空重，奇瑜计已非。长堤悲蚁溃，南望恨依依。

天限双沟险，迢迢一线危。溃师悲叔冀，拜寇晒凝之。赏滥羊头谚，名惭狗尾嗤。夷门徒设备，儿戏竟何施。

相国临戎幕，偏军势实孤。桑榆虽奋翼，瘡痍竟捐躯。露布空书捷，长鲸尚贖诛。劳臣叨主眷，秘器赐珠襦。

偏师来陇上，电迈入郾房。云栈青天逼，星关赤帜张。居民何瘵敝，经乱益荒凉。忝说维城胄，君恩久未偿。

吕母兴东海，征娥乱越裳。如何女子队，兵气返高扬。宝镜辉帷幄，明珠耀衲裆。须眉竟谁在，巾幗肆猖獗。

浪说金房险，封豕任往还。烽烟连蜀栈，风雪拥秦关。谋本书生误，功仍上赏颁。商南遗老在，白首泪空潸。

由来群盗起，大半迫饥寒。何事陶猗富，生心首祸端。禁军

驱暴殛，天语受降宽。浩叹巴陵土，秋风血未干。

### 癸酉纪变

皇帝癸酉秋，九月既望日。大盗聚奸宄，逆计倍回遁。室庐近畿辅，据社成鼠穴。音耗通禁闕，阉寺互交结。初云开佛会，荣华名远□。狐□矫讖纬，阴谋何曲密。怀刃入城闔，抱关罔盘诘，一任□市井，歌啸良暇□。□然惟杨公，闻命已战慄。双扉未及闔，狂澜遂放溢。学士退木天，遇贼声奋叱。匆匆赴青宫，龙种自英烈。戡乱在须臾，防御果轻疾。拓手火枪鸣，收功倍神决。维时公卿辈，勇懦难尽述。或匍匐赴义，或偃仰漫媮。或河上逍遥，或括囊自洁。倂倪推维城（庄亲王绵课），征裳铁为辔。首先提玉桴，进止咸应律。荀羨方青年（安成），娟秀颜玉洁。去病性勇鸷（爽灏），穿杨伎精绝。三将兵气扬，慷慨挥士卒。遂能擒巨鲸，薇垣赖宁谧。时余方手谈，闻命骤飞驕。曲突或有补，甌生力阻遏。统兵守西华，余氛力捕掇。手自戮巨鲸，衣襟半渍血。深夜扈禁御，翘首悲皓月。黑云拥震霆，银光翻列缺。天心实效顺，妖言终俯出。须臾风严寒，肌肤觉凛冽。孤臣卧丹陛，愤悒声呜咽。传闻构乱初，鬼域多附列。或献持重策，改期待后发。紊错非人谋，贼首遂拥闕。走卒疾如鸟，下车立摧挫。宛若缚鸡犬，千钧载一发。余党焰乃熿，潜兽免猖獗。奈何决狱吏，未能净孤窟。草率布刑宪，兹意余不达。虞巡驻郊圻，闻变返警蹕。从容密布置，功罪明赏罚。大廷广咨询，王言载纶綍。大哉罪己诏，痾鰥痛入骨。别馆献俘囚，市衢正斧钺。佇见中兴朝，明良昭佩纒。庶几知勉蕤，往习尽洗伐。效灵固有神，凶顽皆剗灭。煌煌万年基，匡翊赖邦桀。

### 吊王功伟茂才

世儒勤琢句，此叟独茫然。株守兔园册，心轻鱼鸟笺。葆真

希俗识，抱朴信天全。孝友由资性，蓬门棣萼联。

叔季才非弱，扶持恐色违。传餐同举案，谒客互更衣。严课书相授，招凉扇共挥。白头羞析产，甘守故园扉。

北海开樽日，鲜之每自来。久谈神愈健，直净意无猜。秋雨寻幽菊，春风玩绮梅。养生在鞠录，遗训敢倾颓。

晚年恒目眩，近复患河鱼。一夕川流逝，三秋恨莫舒。寝门希弱息，灶侧有残书。嗜好平生悉，哀鸣解效驴。

### 九松山

古寺千峰上，苍松干似虬。翠涛闻夜半，凉月四山秋。紫塞横危槛，青云入峻楼。崔君题句在，吮笔敢赓酬（壁上有崔大司马应阶原倡）。

### 游雏凤主人惠园

主人习静闾柴扉，除却斯文进谒稀。荷绕空庭香扑袖，瀑穿层岫翠浅衣。姱容曼睩歌初奏，雪椀银浆酒共挥。说剑谈天畅怀抱，满空星斗坐忘归。

后圃传闻近缮修，层廊曲榭益深幽。笙簧竹满王猷宅，潋滟云开庾亮楼。排闥正思穷胜景，闭关何意阻清游。登堂自有彭宣辈，愧我论交未密稠。

### 和秋斋主人南苑冬猎元韵

严冬校猎禁城南，原圃□宜骋锦骖。生击黄獐君自足，近追飞走我何堪。吹开草径风加劲，冻折旌竿雪正酣。日暮收围情未减，悬应玉帐纵雄谈。

### 吊旭亭师

颠覆惭师训，音书久未通。何方鸿脩至，远报鹤高翀。目断

吴门树，心伤江上枫。神交追往昔，恻悵泪盈胸。

龙头传祖德，世纪耀簪裾。洞仿包山象，门依临顿居。操持多贲货，矜躁每蠲除。口惠喧奴隶，终身乐有余。

诗律老愈细，欧苏翰墨邻。金针无异术，三昧莫如真。瘦劲书家法，精严史氏醇。晓钟萧寺近，清听悟前因，（师有《听钟楼诗集》）。

慨叹家中落，南云抗策经。浪浮彭蠡绿，海涌越山青。心厌功曹驾，愁听幕府铃。归囊诗卷富，白首户常扃。

就养来京邸，闲鸥寄此身。日华尝就聘，风味久相亲。击钵吟成雪，飞觞醉即春。朱门重高谊，珠履款嘉宾。

愧我原凡质，师筵善诱将。清谈援典据，引譬悉辞章。谨厚时申勗，矜严预戒防。奇殃如逆睹，追愧涕沾裳。

正际严冬候，冲寒粤峤行。岭梅迎驿路，燕雪送行旌。地暖红绵舞，林昏紫瘴生。怀人诗句好，疑挟怒潮声。

再驾燕南轡，慵登鄂渚舟。挂帆归里巷，诗酒乐优悠。叟聚香山席，人同洛水游。孙曾堪慰老，绕膝步吟讴。

季子才腾蹕（谓所瞻），官羞簿尉卑。何堪摧玉树，未果奠金卮。方悚邻遭毁，重逢岁□□。暮年心恟怍，卧病遂支离。

一夕辰星陨，吴门雪正飞。□容辞寓世，香气绕空帏。酒奠枫桥路，旌飘虎阜晖。关心惟仲氏，不及叩亲闱（谓桂舲尚书）。

### 送韩桂舲司寇闻讣归里

满天风雪急扬舲，群饯河桥酒幔青。只为丹衷纾国计，遂令白发误趋庭。麻衣泪洒寒云重，孤棹心如落叶零。归睹亲帏应泣血，空山正好读遗经。

### 贺旭亭师八十寿

此日吴门竞管弦，福麻臻备异当年。蹁跹凤翊登三事，腾蹇

龙纹赐九天。箬笠萧闲云际鹤，杖藜轻健地行仙。更看文度归乡井，手捧黄麻贺绮筵。

忆昔垂髫问字时，春风正及寿觥期。鹿麋延访山深入，鸡犬提携宅始移。南苑钟声萧寺月，西窗竹影梧巢诗。卅年欢笑情如昨，绛帐光阴迅莫追。

阳羨曾闻讲席开，六旬诗酒日追陪。晴波远鼓荆溪棹，夜雪时探洞口梅。自喜暮年身朗健，差强少壮志灰颓。那期更享耆颐寿，天上恩荣泛酒杯。

自愧芜词薏芥如，洪钟三度叩庭除。山居远寄毘陵雁，水国重通茂苑鱼。扶杖久闻孙绕膝，添筹更见喜充闾。窦公佇待蒲轮召，好向金门献乐书。

### 和旭亭师八十自寿元韵

我慕乐余叟，穷通总晏然。□交存古道，负郭少耕田。旷达身安命，康强寿自天。称觴刚二月，花柳各争妍。

恬澹心栖息，诗文属绪余。深期孙玉树，厌说子金鱼。待月眠幽壑，辞宾避佛庐。保家箴诫在，须守故园初。

鹤发归乡井，骊歌饯国门。佳辰曾两度，未及引芳樽。绛帐情如郑，青山啸似孙。闭关高谢客，无复餽蒸豚。

何当违讲席，旧雨廿年零。泽国生春早，江天入望青。巾衫居里闾，圭组厕明廷。两地情无限，关山梦屡经。

### 挽法时帆

诗龕老叟身朗健，削胃蒸羊能啖饭。春风携杖来庭除，手捧酪奴酣水战。谈天说项意简傲，妙口纷葩骋雄辩。韶光别去五日余，何堪匆促通讣书。谢安未及起泉石，乐天竟返仙山车。闻说晡时尚宴客，手谈一局何温舒。慧光昭灼立恒化，尘块委蜕诚须臾。忆昔同君订缟紵，胶亲兰契肝肠露。秋灯春雨久徜徉，事功

每求将伯助。君方拥铎槐市间，南陈北李名齐著。金闺英彦列门墙，鸿文选汰精笺注。相期纶阁早跻攀，四岳云兴降甘澍。那知鹏翼遭摧折，世路崎岖身阢隤。暮年谢病归柴桑，紫绶金章甘请决。少年轻薄任嬉笑，惟我知君品孤洁。从今激切同谁论，素车白马空招魂。人琴俱碎我何叹，斯人早丧诸君存。

### 游西峪寺

山径逐藁若，蜿蜒不觉远。萧晨秋露零，滉漭四山满。橡栗色已浓，乌柏赤犹浅。古寺傍平陂，初阳升翠巘。梵呗隔涧闻，禅宗共扬阐。耿耿触幽怀，修持敢力勉。鸣禽噪深林，冷然发深善。

### 游石经洞

山腹洞厯厯，梵典瘞藏久。石扉闕白云，森严鬼神守。隋代飞锡流，立愿穷雕剖。三藏竟收罗，肩贮期不朽。我来拂遗尘，浩叹自垂首。六经传洙泗，鸿文焕星斗。汉唐广著述，羽翼意良厚。奈何遭丧乱，十不余八九。残编难补缀，弃斥如敝帚。古倘有好事，剡刻传户牖。典籍可保存，安得遭躡蹂。奈何儒学者，同类自倾培。反恐前贤书，讲解幸传后，视彼异教徒，自觉腴颜否？

### 宿西峪寺

暮宿招提境，禅房淡客情。弹箏秋蟋语，骤雨夜泉声。果榼分斋餽，茶汤到处迎。悠然忘旅况，端好学无生。

翻经聊遣兴，参佛懒登楼。落叶碧潭积，四山红树秋。马嘶僧送客，石遏水争流。自叹身行役，灵臯莫暂留。

### 南苑大阅恭纪

草绿城南路，晴开御苑云。霓旌排八阵，翠葆拱中军。环海

销兵气，鞞桴绍旧闻。承平宁废武，简阅敢忘勤。吉日腾骧列，萧晨鹅鹤分。螺笳鸣夜鹤，鼙鼓聚宵蚊。阵变夔州石，钲严郢匠斤。槎枒埋鹿角，蹀躞骋兰筋。刀落涵秋水，旗翻偃绮纹。兜鍪霜耀雪，袴褶露沾裙。□进云初合，三驱日未曛。选材由鞞鞞，养士重乡□。在昔龙蛇岁，荆襄煽贼氛。雄师摧惨暴，虎旅救漂焚。紫殿闻宣捷，凌烟早策勋。赓歌诗载笔，凯宴酒余醺。典礼传昭代，仪型继馥芬。非惟修捍御，实以卫斯文。厚赉貔貅喜，同观万姓欣。煌煌诚耀德，休烈奉吾君。

### 送吴春麓祠部兄弟归里

寒天淡日沉西郊，朔风振木如虎咆。吴君昆仲泣拉血，麻衣扶柩言归巢。野圻匹马走相送，萧寺荒僻鲜佳肴。杯酒危坐话离绪，山藪烹借僧斋庖。畴昔太邱主讲席，两难并美夸同胞。伯子天性尤厚挚，早投縞紵倾心交。晴郊鞍马春共踏，枯灯竹馆书同钞。闲时道义互励勗，意气相合如投胶。中年筮仕历礼院，殿庭侍从登螭坳。曲台政绩议侃侃，迂拙一任千夫嘲。方期彦升登荐牍，轺车五马居前茅。那知共抱蓼莪痛，硕果未及占羲爻。风霜笨轭别亲友，殷勤握腕难轻抛。君今闭户且读礼，析产笃行同薛包。明时应早返京阙，慎勿高隐居杞櫟。言终挥泪送君去，归途月挂空林梢。

### 喜吴春麓至

冷月别燕都，三秋岁月徂。懒将通塞雁，端合钓江鲈。已道人归隐，何期客载途。重逢看仔细，皓发满头颅。

扫榻延宾坐，呼厨检食单。旅情偎膝诉，旧句倚肩看。心豁三秋恨，杯开此夕欢。连床谈未竟，已报夜将阑。

### 喜吴履庵登进□

父兄惧掇第，叹汝独沉沦。那识年逾壮，初探上苑春。玉埋

光愈灼，金拣〔炼〕品尤真。漫道风光老，蓬瀛定首抡。

### 送吴履庵之四川县令任

春风偃枕叹维摩，药盞茶铛困病魔。自叹词人伤鷓鸟，可堪良友唱骊歌。笳声雁影秦关早，铃语鹃啼蜀道多。此去行人须努力，迢迢千里恨如何。

两家交谊首逢君，廿载萍踪几聚分。弹铗高歌淮海月，扬舲远载楚江云。才看蓬阁转鹏翼，会叹河阳散骥群。好是文翁遗教在，天涯惠政早相闻。

### 送吴履庵归里

巴渝返旆未经旬，又向天涯觅窅窅。古驿长亭燕市月，疎梅浅柳皖城春。还须轩盖趋华省，切莫烟霞伴隐沦。纵道折腰非我分，倚闾应念白头亲。

### 送张爱涛大令之甘泉任

三年珥笔侍銮坡，此日徂迁叹坎坷。关塞莺花迎客少，边城风雨入秋多。棊藏宝气珠难掩，匣淬寒光剑久磨。好是小鲜聊试手，讼庭端可教弦歌。

忆昔春风赠紵年，九龄风度最清妍。平台挥麈朝呼酒，雪苑拈题夜擘笺。简傲耻呈安道技，疎狂争说步兵贤。何堪更向崑函路，燕树秦云倍黯然。

### 送鲍双五学士督学楚中

仗节遥临江汉东，珊瑚久见网群雄。中州春雨菁莪盛，汾水秋风藻鉴公。婞直须防歌乳虎，抡才应悔重雕虫。此行端好培文化，会采榘楠萃楚宫。

临别衔杯意气深，赠言婉切可为箴。濮桑淫技宜驱摈，堂构良

材早觅寻。行惠须当宽仆竖，放怀且自减歌吟（以上皆先生教诲语）。长谈莫计前途远，举首何堪日易沉。

### 寄鲍双五学士

遥忆荆南客，輶轩载使星。江吞三楚白，山接百蛮青。春暖帷张锦，衙深阁护铃。课文多暇日，仍复读遗经。

羊公留古迹，岘首有残碑。此日君亲读，沾襟泪散丝。白云人迹杳，秋雨碧苔滋。惟有襄陵水，东流似曩时。

### 闻鲍双五高擢阁学志喜

岩廊见除日，故人近迁擢。抚掌喜欲狂，高声惊隶仆。君本珪璋材，荆南久督学。三载勤劝课，楚材尽收录。秋风返归旆，大盗阻广陆。报命敢淹滞，摩垒宵征速。中道上谋画，兵律贵严肃。推毂荐良将，边关召颇牧。遂使销氛燧，鲸鲵早屠戮。实为社稷臣，朗抱非碌碌。缟紵廿载交，未审所藏蓄。高班简帝心，芸阁衣熏馥。会见登九列，金瓯待枚卜。

### 慰双五司空

温室讳不言，皇居应慎密。煌煌宽大诏，臣子宜宣述。君性本飒爽，蛾眉遭众嫉。劝诲属吏语，忠诚贯天日。奈何鬼蜮徒，谋孽何匆疾。三人势成虎，隐衷谁代质。堪惜干将材，明时遭废黜。旨酒可盈樽，匡床宜鼓瑟。杜门独恬荡，琴书自暇逸。佇见召陆逊，终难隐李泌。岂容梗概臣，蜗庐久抱膝。

### 送鲍子坚之楚中

西风棘院叹嗟跎，卞璞心伤待琢磨。未果燕台沽骏马，且从江馆听鸣鼉。月明秋渚人移棹，木落澄潭客放歌。此日高堂应朗健，加餐试问近如何？

### 赠张茶农解元

张绪清狂弱柳如，年来好作比邻居。壮怀惯贯屠门酒，客况真成野衲庐。岸帻不妨行抚剑，敝裾解叹食无鱼。悬知把盏多吟兴，不为贫愁始著书。

莺花三月怅斜曛，酌酒平台每召君。小阁平台同听雁，芸窗雨夕共论文。青樽红友心须罄，紫柰黄柑手自分。转瞬春风迟报捷，上林端好挹清芬。

### 送张茶农南归

游子行何驶，归程计尚遥。帆迎京口月，钟送海门潮。争欢尘埋璞，谁怜筍敝貂。酒兵端可用，聊足慰深宵。

宿草悲畦孟（谓桂文教公），开筵忆孔融。何当重话别，樽酒饯东风。驿柳偎蓬绿，江霞射槛红。归吟应满篋，及早付飞鸿。

### 夏日招张茶农游极乐寺

古寺浑忘暑，山容扑面青。荷香浸四座，苔影散空庭。树老乌营垒，天晴鹤振翎。呼僮招密友，飞瀑好同听。

排闷来何速，高谈意气扬。唯应中散眼，解识次公狂。巾帻宜齐脱，诗歌许互商。徜徉归去晚，明月上萝墙。

### 近日收买书卷多芸楣参政藏本感赋四绝

沽来典籍裹残终，自撷精华细品题。一点猩红明卷轴，尚书旧印感鸿泥。

收藏近日属南昌，永叔评论独擅长。好是石渠多秘本，缥緗钞就贮书仓。

往时曾喜比邻居，犹记空庭谒见初。绿竹千竿花数本，丹铅

竟日坐摊书。

自从绿野闭空堂，万卷抛残倍可伤。差胜绛云楼百尺，春风一炬感兴亡。

### 送吴兰雪南归

十年书剑欲归难，依旧槐厅守冷官。手擘黄柑倾绿蚁，心伤皓首困青毡。老亲菽水应萦念，小妾糟糠信寡欢。一旦闻鹃思故土，佯然抱被出长安。

夕阳樽酒钱可涸，犹记西园会晤时。腊月讌游嫌旧酿，元辰投刺夹新诗。萧娘却扇吟成早，灵运登山约订迟。此日分襟倍惆怅，西江烟雨系相思。

### 重有感（纪癸酉变也）

禁垣仓卒突萑苻，变出非常自古无。闭阁衡文京兆尹，登高作赋执金吾。早令健吏关心诘，焉得奸民夺臂呼。可叹从龙褒鄂裔，反将密策暗倾输（谓都司曹纶辈）。

纓系张韶献捷书，国仇湔洗愤微纾。争看京观鲸遭戮，庶可长镰莠尽锄。讹语纷呶须自息，夜器成沸究何居。伤心罪己天王诏，捧读丹墀泪雨如。

### 喜闻滑县大捷

陇西上将拥鸣镝，筑垒围城握算饶。困兽栈空将内溃，风鸢信断倍魂销。崔公跃马戈磨铁，付永登壕燎贮瓢。漫道火攻真下策，功成一炬未崇朝。

### 赠杨时斋军门

生挽雕弓鸣霹雳，千人走避杨无敌。十年戎马冲贼锋，终始勋劳惟尔力。杨侯生长邛樊间，弱冠从征碣寨侧。一夫阨险胆如

天，青眼曾叨令公识（阿文成公）。半生落拓何足云，一旦秦蜀起战云。将军揽辔目如炬，猛虎直入羝羊群。坐下驷骖日千里，驱驰古栈清妖氛。贼人直趋两当县，万骑如山天不见。惟侯日暮提孤军，天梯石磴来酣战。沉光摩垒诚飞仙，孤延横槊斗雷电。狼豕诛殄谿壑填，遂使奸民渐离散。昨秋河北举燿烽，陇西健卒如云从。幸喜亚夫坐帷幄（谓那绎堂），与侯一心成大功。手提馘首献廷阙，走马直入明光宫。天子召见动颜色，高分茅胙名优崇。侯今归镇三秦土，种菽投壶事偃武。闲生髀肉日摩挲，高卧军门靖鼙鼓。

### 挽李忠毅公□□

惊涛汹涌颭颭风，旌旗飞捲如长虹。将军出海驱艨艟，灭贼朝食志赳雄。犀蒙巩阙珠嵌镞，矢飞电激弯雕弓。三千壮士额抹红，鲸鲵巢穴深击冲。火攻四发烟焠燧，帆幡焚毁贼内讧。泗水逃匿无影踪，公欲直入沧溟东。闽南节使材鄙庸，开樽饮至言露衷。与其濛汜追无穷，曷若馘首权冒充。君亦坐享磐石封，将军掷盃声怒馼。笑君谈吐诚恇懂，丈夫刀剑久断砉。誓擒道覆生载辎，未敢昧良欺九重。振旅再出门凿凶，孙卢岛屿今始逢。合围已若鹿入罟，管敢机洩贼计钟。偃蓬潜发矢贯胸，来歙抽刃无惨容。遗章自草緘奏篋，我皇手启心伤忡。褒赉大国旌殊功，名祠建筑高崔嵬。幕下材士半耿冯，剪寇易若撻蒿蓬。复仇报矢摅悃忠，坐见海国销传烽。

### 游万寿寺

兰若歌河湟，东风拂柳丝。入门境阒寂，藁若相纷披。虬松奋鬣髯，奔涛惊鬼魑。叠石状嶙峋，矗入云表齐。曲径最险隘，危磴高复低。行人踵相接，回首路已非。身疑入林壑，咫尺迷东西。人工信倣诡，芥子藏须弥。僧寮戒律严，分座持清规。伊蒲

供餐馔，竟日闲游嬉。薄暮鼓归桡，微寒上客衣。

### 城西僧舍看花

盍簪选胜集郊西，梵宇壶觞许共携。鸦送残阳归岫早，鸟催花气入帘低。人前狂笑同彭泽，诗畅幽情仿会稽。最是青圻春正好，裙腰绿上草萋萋。

瑶蕊繁英绕野庭，春宵酒散客初醒。禅床独宿花为伴，竹坞题诗翠作屏。寂寞更长星近户，凄凉卧久月移棂。明晨跨马寻归径，隔树流莺最可听。

### 赠檀栾卿

碧城缥缈隔层霄，底事人间许见招。曲榭纱窗时抚帖，碧梧新月喜吹箫。风飏弱柳围腰细，酒晕朝霞笑靥潮。好是深更初话别，临行目送最魂销。

曾携仙子董双成（谓吴花依），素袂珊珊下玉京。桂楫中天期荡月，银槎七夕定心盟。侠肠自负操冰鉴，媚骨偏教惹恨情。每到酒阑谈世阅，青衫累我泪如倾。

### 题吴郎花依画兰便面

乍含毫素写东风，整整斜斜态自工。恰是美人宜作佩，可堪谱入楚骚中。

翠袖丁东王钏宽，添枝放叶写来难。可怜花亦如人瘦，一点清芬最耐看。

空谷生香品自佳，何须人世斗铅华。阿奴解释春风未，偏写临风并蒂花。

平章花月本吾曹，醉写云烟落纸豪。漫道时宜难俯合，同心犹有郑樱桃。

### 陆郎婉卿书《赤壁赋》于便面诗以纪之

玉腕轻盈染翰迟，恰宜月影上乌丝。何当玉露金风候，更写坡仙绝妙辞。

蝇头半幅字无多，妙楷钟王认磔波。何日扁舟泛江渚，烦卿银管抚高歌。

### 寄韩桂龄中丞

迢递羊城路，秋声不可听。鲸翻夸岛黑，龙挟海涛腥。戍远弛边柝，衙荒静阁铃。遐陬勤抚字，易俗贵明经。

盗帜连溟渤，三秋尚贷诛。虎门传夕燧，鳌岛拥征舻。上将饶铃略，参军献秘图。佇见驰露布，计日获孙卢。

### 韩听秋大令失明诗以慰之

吴门病叟扶藜哭，三月呻吟苦病目。金篦难刮渐生翳，予才危行赖僮仆。半生怀抱竟何施，一世经纶枉抱蓄。我言君休自猜忿，天公佈置无盈缩。君才瑰玮信国器，万卷行披笥藏腹。未能瀛闾早登临，骐驎今看困局促。一官匏系鸡肋如，仍守寒窗待颁禄。一朝捧檄向天涯，僻郡山城叹孤独。簿书山积日判签，五斗折腰身受辱。况君原非百里才，错节盘根难琢磨。倘然命蹇挂网罗，祸福由来相倚伏。何如借病善收藏，匿影潜名隐岩谷。高堂饮膳自调护，训课孙枝共吟读。奚况目盲心未盲，国语鸿篇须继续。葆真守道乐无涯，远胜遐陬寄人牧。有时纯孝日舐馐，仍使双眸电光烛。

### 题成王手书梅花诗后

成邸精染翰，笔参造化域。赏鉴叨宸衷，石榻许镌泐。冬日早放衙，萧斋群会食。阶前香雾濛，梅干喜新植。伸纸作行草，墨沈任挥拭。意态各纷葩，妙入群香国。藐彼散花人，古香自喷

逼。停毫畅饮啖，小窗日未昃。锦褱谨护裘，堪为艺苑则。无烦星驿使，邮传关陇北。

### 题思元主人风雨纪游图

西山翠淡浓云铺，空濛烟水形模糊。斜风急雨拥奔马，跳珠万斛鸣菰蒲。主人此时性不孤，扁舟白袷荡碧湖。琉璃万顷鼓孤艇，蛟龙近欲吞樽壶。中流直下雨打面，踉跄不及披襜褕。归来挑灯坐官廨，淋漓洒墨奇才摅。画工暇日写作图，诗篇征取盈纱厨。笑余局蹐倦出户，书仓兀坐如守株。安得束被远游揽，沧浪脱屣乘槎桴。鳞宫贝阙快周历，鲸鲵鞭撻螭鳌驱。摹出粉本定倍此，区区纪胜胡为乎。还君诗卷作长啸，矜张自笑疲据梧。

### 哭纪文达公

燕赵多竖儒，弇陋学凡俗。寝食兔园策，经史弃不读。先生天人姿，广大法金粟。五车富披览，吐辞屏繁缚。新章诵千遍，清芬口齿扑。弱冠登瀛孺，金荃操选轴。轮台远荷戈，采风载行麓。末年侍清秘，鸿文校天禄。巍阁万卷书，长更一寸烛。品鉴定千秋，儒冠齐拜服。纶扉入七日，箕尾骑何速。海内尽惋惜，非惟知己哭。念我困苦块，未果奠芳醪。老成渐凋丧，临风空踟蹰。

### 挽宗兄香东侍郎

何事传飞牍，心惊玉树凋。皇华行未已，楚些已先招。湘月迷孤影，晴江咽暮潮。祖筵曾几日，相忆总魂销。

弱冠登瀛馆，才名峙鲍（双五）吴（尊山）。白门量玉尺，绿鬓领群儒。苟羨官何早，曹成相自殊。立朝羞伴食，侃侃告嘉谟。

枢轴参机务；绳衡性鸷刚。模稜嘲董晋，烹鑊议宏羊。（癸

酉秋，兄奏草示董太保。曰：“恐不当上意。”兄曰：“此何时，尚蹈迎合习邪？”太保惭谢。又某相畏贼移师，兄清明正典刑，虽未见允，士论魁之。）甫见兵销滑，何期客赋湘。传闻雍牒夕，如火陨星芒。

棠棣居邻巷，尤难嗜好同。清晨敲室户，深夜报诗筒。驾共东山玩，樽联北海雄。一朝悲永诀，雪涕洒凄风。

### 挽伍尧凝之舍人

骚坛廿载侍坡翁（谓时帆先生），苏过青年气若虹。共羨名驹空北地，果看雌凤捷南宫。禁垣槐荫袍垂绿，薇省花翻袖拂红。一旦苍凉埋玉树，寝门端合哭西风。

中郎衰经计新除，犹记相逢首夏初。梅雨湘帘仍命酒，药炉乌几尚翻书。玉楼叹尔征招速，斗室惭余问讯疏。太息周嫠困菽独，寒灯繡帐恨何如。

### 辛未病中杂吟

鼻衄奔腾势喷珠，朝朝眠食倩人扶。敢言诸葛劳军簿，差胜灵芸吐唾壶。强塞何堪堤屡决，债军浑似将逢孤。萧条白昼依床榻，夔夔真成七日苏。

残躯宛转息奄然，重染河鱼病愈延。自厌心花仍种种，敢夸腹笥尚翩翩。厕筹屡执髯奴怨，香枣频更小婢怜。漫道蕪营能御疾，膳夫久未进朝饘。

伉侠回思少壮时，经年亦复病支离。扶筇尚蜡游山屐，支枕犹吟待月诗。卫玠春风逢梵舍，子荆苦雨饯河湄。而今老大颠颓甚，顿觉秋霜上鬓丝。

更无丹药驻衰颜，已分芳魂返道山。耻效分香传后世，聊留家训付人寰。丹枕自叹忠何补，遗憾惟余句未删。漫道黄垆真可息，最难勘破是情关。

别苑笙箫久罢停，梨园今见散如星。孤梁月落凉歌席，六扇云销空锦屏。晚鸟归林嫌若舞，寒蛩绕砌忍相听。更逢丽质轻言别，握手深宵泪共零。

风月欢场已不期，开衙放妓胜情痴。粉抛翠阁香仍在，镜暗蛛尘槛未移。樊素远行谁诵偈，杨枝乍去尚留诗。而今蒲座甘枯寂，色相驰心总自持。

匝月偃眠近渐兴，孱躯陡觉暮寒增。魂飘木叶惊秋雨，梦入虫天苦夏冰。药灶匆忙烧兽炭，絮衣珍重裹乌绫。庭柯阵阵鸣颺急，独听深宵意不胜。

遣闷扶筇小院西，畦花历乱草侵蹊。园丁野港安渔网，稚子空梁掇燕泥。桥侧柳枝横磴窄，篱边瓜蔓压扉低。徘徊不尽荒凉甚，且向萝垣认旧题。

经秋久病日蔬飧，强起扶筇迓至樽。宿雨苍凉飘塞柳，夕阳明灭淡孤村。迎銮鞠膺抒臣愿，揽辔温存志主恩。向晚归途栖古寺，万山深处始开樽（是日宿九松山）。

自信浮生梦本长，非关药饵起膏肓。玉绳低转疴方重，金镜平分体业强。湘浦谁牵长命缕，蓬山真爇返魂香。从今障碍应消释，斗室和南礼梵王。

### 同法时帆游万柳堂

东山修沐地，万柳护堤栽。宸翰中天辟，僧寮四座开。歌弦冤冕集，觞咏士林陪。幸际升平日，优游信快哉。

自返平泉驾，招提日就荒。粉榆穿败砌，薜荔补颓墙。估客栖禅榻，斋钟卧夕阳。百年真那刹，人世感炎凉。

好事云卿叟，林泉志本同。临流添小阁，移石葺禅宫。补柳飘新绿，栽篱护晚红。烟霞山磴满，揽胜好扶筇。

峭壁曾题句，鸿泥近十年。何期同曼倩，此日踏云烟。楼槛今重倚，林泉昔独穿。无端兴废感，相对意萧然。

### 游万柳堂和吴春麓祠部壁上韵

南苑归多暇，晴郊事远游。文星新筑阁，宸翰久名楼。挂锡僧常住，停驂客暂留。竚看题壁句，旧雨记绸缪。

洛邸求名日，论交我独亲。竹窗分课句，蛮榼共寻春。闲畅神偏倦，清恬性自真。浩然思海内，谁是九方歆。

先生情旷远，亦复事游嬉。风雨逢今夕，壶觞怅往时。老来繁缚屏，醉后款行欵。五字惟元度，名流共见推。

念我来何晚，风光尚及时。柳高莺语细，水阔燕归迟。京国春如海，天涯鬓若丝。锦笺裁句就，端合寄微之。

### 哭秋斋主人

槭槭悲风动，凄凄暮雪霏。何堪多病日，更复哭君帔。生死交应见。磋磨道不违。九原终抱恨，白发叹亲闱。

总角时相识，儿嬉逐篠骖。论文情剴切，斗句意沉酣。启事招商榘，家箴许核参。云泥虽判隔，曾与共辛甘。

西园常设醴，亲见叶宫商。径曲歌声缓，堂深月影凉。呼伶吹玉管，选伎侑金觞。客散多清夜，城谯漏未央。

问疾方旬日，欵床尚较文。已闻占勿药，何意竟埋云。曲谱皆重佚，诗囊半就焚。寝门空恸哭，徒倚帐斜曛。



蕙荪堂燼存草卷一

昭德顯類老人錄

余少耽吟咏寒暑不輟至乙亥冬手訂三十卷不意  
身罹罪戾詩草盡被悍僕焚燬幸他室有幼歲所著  
者今已錄出其丙辰丁巳戊午及庚申至甲子戊辰  
至乙亥數年之作皆湮失無存曷勝搯腕今於戰日  
將記憶者叢錄二卷以存梗概詩之工拙不復計也  
己卯夏日書

春日十詠

春城

蕙荪堂燼存草

北京圖書館藏